

Revidert oktober 2018

Samarbeidsavtale

Bergen Reiselivslag

og

Kommunane i Region Nordhordland

(Austrheim, Gulen, Fedje, Lindås, Masfjorden, Meland, Modalen, Osterøy og Radøy)

1. Bakgrunnen for avtalen

Det har i fleire år vore arbeidd nasjonalt og regionalt med å effektivisera og betra reiselivsnæringa ved å utvikla reisemålsorganiseringa. Dette arbeidet har vore støtta og stimulert av Hordaland Fylkeskommune basert på signal frå sentrale reiselivsmynde der ein nettopp ønskjer slike endringar for å styrkja og profesjonalisera reiselivsnæringa regionalt.

Bergen Reiselivslag har i samarbeid med Nordhordland Utviklingsselskap IKS og Nordhordland Næringslag utarbeidd framlegg til ein Forretningsmodell for ein ny regional reisemålsorganisasjon med arbeidsnamn "Nye Bergen Reiselivslag". Utgangspunktet har vore at med ein slik organisering kan vi styrke reiselivet i Nordhordland og totalt i heile regionen.

Gode Sirklar og Vest Næringsråd har teke del i det same samarbeidet slik at Forretningsmodellen inkluderer ei framtidig organisering av reiselivsnæringa i kommunane Fjell, Sund og Øygarden.

Forretningsmodellen slik han føreligg ved underteikning er grunnlaget for avtalen.

Resultatet som ein siktar mot er at "Nye Bergen Reiselivslag" skal vera ein felles ressurs for reiselivsnæringa for kommunane i Nordhordland og kommunane Sund, Fjell og Øygarden, i denne samanheng definert som *Region Bergen*. Dette er basert på at Bergen Reiselivslag sine ressursar vert fusjonert med ressursar som dei to regionane bidrar med i den nye organisasjonen og at dette skaper grunnlag for auka ressursar og berekraft for reiselivsnæringa i Region Bergen.

Framlegget til Forretningsmodell byggjer på nokre føresetnader som er felles for partane:

- Samarbeidet i "Nye Bergen Reiselivslag" styrkjer reiselivsnæringa i regionen ved at ressursane i den nye organisasjonen går med til å styrkja reiselivsnæringa i *heile regionen eller i Region Bergen*.
- Kommunane i Region Nordhordland; Austrheim, Fedje, Lindås, Masfjorden, Meland, Modalen, Radøy, Osterøy og Gulen bidreg varig med økonomisk tilskot og med ressursar i etableringsfasen. Jmfr kapittel 6, økonomiske forhold.
- Bergen Reiselivslag må vidareføre og styrke samarbeidet med lokale reiselivsaktørar og Nordhordland Utviklingsselskap og sikre tydeleg nærvær lokalt.

Formelt er det kvar einskild kommune som vert medlem i Bergen Reiselivslag. For å sikre ein felles strategi frå kommunane vert Nordhordland Utviklingsselskap IKS (NUI) nytta som eit formelt bindeledd i saker som gjeld alle kommunane med Bergen Reiselivslag. Det er difor viktig at Bergen Reiselivslag har god kontakt med NUI.

Alle kommunane kan som medlem delta med ein representant på årsmøte til Bergen Reiselivslag. Den årlege kontingensten vert innbetalt frå NUI til Bergen Reiselivslag. Den totale kontingensten vert fordelt på kommunane ut i frå ein nøkkel som kommunane vert einige om.

Etter at Osterøy kommune gjorde vedtak i juni 2018 om å bli med i avtalen, og Gulen kommunestyre i september 2018, er avtalen revidert. Osterøy vert med i prosjektet frå og med 2018, medan Gulen kommune er med frå og med 1.1.2019. Frå og med 1.1.2019 er alle kommunane som deltek i Regionrådet for Nordhordland òg med i Bergen Reiselivslag. Denne reviderte avtalen erstattar den tidlegare signerte samarbeidsavtalen mellom Bergen Reiselivslag og Region Nordhordland ved NUI.

2. Målsetjing

Målet med ein større organisatorisk region er å oppnå en sterkare posisjon nasjonalt og internasjonalt. Målet er vidare å gjennomføra tiltak som kan gje større effekt av det vi alt gjer, samt gje regionen auka ressursar i form av økonomi, kapasitet og kompetanse som gjer oss betre i stand til å konkurrera på like vilkår med andre regionar. Den nye organisasjonen, "Nye Bergen Reiselivslag" skal styrkja omdømme, berekraft og ikkje minst lønsemd for reiselivsbedriftene.

Målsettinga er og å etablira eit tydeleg regionalt avtrykk for reiselivsnæringa gjennom eit regionalt og synleg vertskap som dels er basert på ressursar frå "Nye Bergen Reiselivslag", og dels er basert på regionale ressursar.

3. "Nye Bergen Reiselivslag" sine bidrag

- Bergen Reiselivslag har p.t. 11 årsverk som arbeider med marknadsføring, sal og profilering. Desse ressursane vil arbeida for heile Region Bergen som reiselivsdestinasjon, nasjonalt og internasjonalt.
- Bergen Reiselivslag har p.t. 14 årsverk som arbeider med vertskapsoppgåver og formidling i Turistinformasjonen eller Vertskapssenteret på Fisketorget i Bergen. Desse ressursane vil arbeida for heile Region Bergen samt å bidra til å koordinera den regionale *vertskapsfunksjonen*¹
- 1 årsverk som arbeider med produktutvikling med fokus på fellesprosjekt, fasilitering, konseptutvikling, initiativtakar og tilrettelegging for utvikling av betre og nye reiselivsprodukt i heile regionen. Denne ressursen er kalla "*Kystminister*", og vil typisk vera tett på aktørar både lokalt og i regionane i Region Bergen, og ha kontordagar etter nærmere avtale i lokale som vert stilt til disposisjon lokalt.
- Den regionale *Vertskapsfunksjonen* vert støtta av Nye Bergen Reiselivslag, dels med personell på deltid, dels ved at infrastrukturen i vertskapsfunksjonen vert knytt opp til Turistinformasjonen på Fisketorget i Bergen, og dels økonomisk.
- Bergen Reiselivslag må vidareføre og styrke samarbeidet med lokale reiselivsaktørar og NUI og sikre tydeleg nærvær lokalt.
- Region Bergen Reiseliv rapportar årleg til Nordhordland Utviklingsselskap IKS og kommunane.

4. Kommunen sine bidrag

- Kommunane i Region Nordhordland som er med (Austrheim, Fedje, Lindås, Masfjorden, Meland, Modalen, Radøy, Osterøy og Gulen) bidrar økonomisk til næringsutvikling, marknadsføring,

¹ Med Vertskapsfunksjon er her meint den synlege ressursen eller destinasjonen som representerer reiselivsnæringa regionalt som del av vidareføring av Kysteventyret

- profilering, produktutvikling og vertskap. Dette vil inkludere bidrag til den lokale Vertskapsfunksjonen slik som forretningsmodellen til "Nye Bergen Reiselivslag" legg opp til.
- Kommunen bidrar med tilrettelegging for etablering og drift av Vertskapsfunksjonen i samarbeid med NUI.

5. Avtalens styringsverk

Kommunane i Vest og i Nordhordland har rett til eit styremedlem med personleg varamedlem til styret i "Nye Bergen Reiselivslag". Desse vert valt for to år om gongen og alternerer mellom regionane. Representant til styret i Bergen Reiselivslag frå Region Nordhordland vert utpeika av ordførarane i Regionrådet (av dei kommunane som er med). Den som vert peika ut til å delta i styret bør ha god kunnskap og interesse om reiselivsnæringa i Nordhordland.

6. Økonomiske forhold

Det økonomiske bidraget frå kommunane i Nordhordland til reiselivslaget, vert rekna ut frå eit fastsett kronebeløp pr. innbyggjar i kommunane, i 2017 kr 18, og justert årleg basert på konsumprisindeksen. Kronebeløpet vert fastsett av Årsmøtet i Nye Bergen Reiselivslag. Større endringar må godkjennast av kommunen. Det økonomiske bidraget vert løyvd ved starten av året. NUI krev inn det totale beløpet frå kommunane ut i frå ein fordelingsnøkkel som kommunane i Region Nordhordland er samde om.

Nye årsverk som nemnd i punkt 3 er gitt at nok aktørar og kommunar deltar finansielt.

7. Tidsramme og oppseiingstid

Avtalen med kommunane Austrheim, Fedje, Lindås, Masfjorden, Meland, Modalen, Radøy vart gjort frå og med 1. januar 2017 – 31.12.2019. Denne avtalen, kor Osterøy og Gulen vert medlem av Bergen reiselivslag gjeld med same tidsramme som for dei andre kommunane, fram til og med 31.12.2019 . Avtalen kan ikkje seiast opp i dette tidsrommet utan at vesentlege føresetnader i denne avtalen vert brotne.

Frå 01.01.2020 gjeld avtalen for eit år om gongen. Oppseiing av avtalen må meldast til avtalepartnaren skriftleg innan 01.10, med kopi til Nordhordland Utviklingsselskap IKS.

Ved samanslåing av dei tre kommunane Lindås, Meland og Radøy til ein kommune frå 01.01.2020, vil den nye kommunen fortsette som eit medlem i Bergen Reiselivslag med mindre avtalen vert oppsagt.

NUI koordinerer arbeidet for kommunane i Region Nordhordland og dagleg leiar i NUI forvaltar på vegne av kommunane denne avtalen. Denne avtalen er i 2-to-eksemplar, eit eksemplar til kvar av partane.

For Nordhordland Utviklingsselskap IKS	For Bergen Reiselivslag
Dato / underskrift 24/10-18 Rune Heradstveit Rune Heradstveit Dagleg leiar Nordhordland Utviklingsselskap IKS	Dato / underskrift 24/10-18 Anders Nyland Reiselivsdirektør Bergen Reiselivslag

